

समे — 12:25

<><><><><>

एह आकाशवाणी जम्मू ऐ. हुन तुस विजय बजाज कोला खबरां सुनो।

PM Rozgar Mela

प्रधानमंत्री नरेन्द्र मोदी होरें बक्ख-बक्ख सरकारी मैहकमें च नमें भर्ती नौजवानें गी अज्ज वीडियो कांफ्रेंस दे राहें 71 ज्हार शा मते नियुक्ति पत्तर बंडे। अज्ज इस सरबंधै च मुख्य भरै च 45 थाहरें पर रोजगार मेलें दा आयोजन कीता गेआ। अपने सम्बोधन च श्री मोदी होरें आखेआ जे रोजगार मेलें, नौजवानें गी सशक्त बनाने दे कन्नो-कन्नी उंदी समर्थ गी नमां आकार देआ'रदे न। उनें आखेआ जे अज्ज भारत दे नौजवान पूरे विश्वास कन्नै हर खेत्तर च अपनी काबलियत दा लोहा मनवा करदे न। उनें आखेआ जे स्थाड़े मुख्य गी केई दहाकें थमां इक आधुनिक शिक्षा प्रणाली दी लोड़ ही ते नमीं राश्ट्री शिक्षा नीति दे राहें स्थाड़ा मुख्य हून इस दिशा च तेजिआ कन्नै अगड़ा बधा करदा ऐ। रोजगार मेलें दा आयोजन पैहली बारी अक्टूबर 2022 च कीता गेआ हा ते तदू थमां लेइयै हूनै तोहड़ी 50 शैहरें च इस चाल्ली दे 13 मेलें दा सरिस्ता राश्ट्री स्तर पर कीता जाई चुके दा ऐ।

<><><><><>

Farmers' Day - LG

मुख्य भरै च अज्ज करसानें सरबन्धी राश्ट्री ध्याड़ा मनाया जा करदा ऐ। एह ध्याड़ा राश्ट्री दे विकास ते तरक्की च करसानें दे जोगदान गी सम्मान देने दा मौका ऐ। एह ध्याड़ा खाद्य सुरक्षा जकीनी बनाने, ग्रामीण अर्थबवस्था गी मजबूती देने ते देशै दी कृषि विरासत दी सांभ-संभाल च करसानें दी महत्वपूर्ण भूमिका दा चेत्ता दोआंदा ऐ। करसानें दी भूमिका गी महत्व दिंदे होई सरकारै उंदे समाजी-आर्थिक विकास लेई नेकां पैहलकदमियां कीतीआं न। इंदे च प्रधानमंत्री किसान सम्मान निधि, प्रधानमंत्री फसल बीमा योजना ते प्रधानमंत्री किसान मान-धन योजना शामिल न। तोआई लेफ्टिनेंट गवर्नर मनोज सिन्हा होरें अज्ज साबका प्रधानमंत्री चौधरी चरण सिंह होरें'गी उंदी जयंती पर श्रद्धांजलि अर्पित कीती ऐ। सोशल मीडिया दी इक पोस्ट च एलजी होरें आखेआ ऐ जे चौधरी चरण सिंह होर इक इक स्वंत्रता सेनानी ते इक म्हान जन नायक हे जिनें अपनी पूरी जिंदगी करसानें दे अधिकारें दे राखी ते समाज दे कमजोर वर्गें गी उबड़ा चुक्कने दी दिशा च कम्म कीता। उनें आखेआ जे चौधरी चरण सिंह हुंदे आसेआ राश्ट्र लेई दित्ते गेदे जोगदानें गी कदें बी भुलाया नेई जाई सकदा।

<><><><><>

Pak Militant Arrest

जम्मू कश्मीर पुलसै पाकिस्तान च सिखलाई हासल कीते दे इक आतंकवादी जावेद मुंशी गी अपनी हिरासतै च लेई लैता ऐ जिसी पच्छिम बंगाल दे विशेष कार्यबल एसटीएफ नै दक्खन 24 परगना जिले च बंगलादेश कन्नै लगदे बन्ने कशा गिरफ्तार कीता हा। इस आतंकवादी दा सरबन्ध तहरीक-उल-मुजाहिदीन नांS दे आतंकवादी गुट कन्नै ऐ ते इन्ने आईईडी ते बक्ख-बक्ख चाल्ली दे थेआरें दे इस्तेमाल दी सिखलाई लैती दी ऐ। लश्करे तैयबा गुट दे बंडे आतंकवादी सरगनाएं दे निर्देश पर ओह बंगलादेश च घुसपैठ करने दी

तक्कै च हा। जम्मू कश्मीर पुलसे उसी अपनी हिरासतै च लेई लैता ऐ ते अगगे दी जांच ते पुच्छ—पड़ताल लेई उसी जम्मू कश्मीर आंदा जाहग।

<><><><><><>

Indian Army VDGs

भारती फौज आसेआ नौशैहरा सैक्टर दे कलसियां च 32 ग्राम रक्षा गार्ड लेई थेहार चलाने दी सिखलाई ते थेहारें दी समझ बारै इक कार्यक्रम दा आयोजन कीता गेआ। सिखलाई आहले इस कार्यक्रम दा मकसद ग्राम रक्षा गार्ड गी आधुनिक थेहारें बारै जानकार बनाना ते उंदे हुनर च बाददा करना हा। खित्ते च मुकामी रक्षा बलें गी मजबूत करने ते आतंकवाद दे खबरे दा मुकाबला करने दी फौज दी पैहलकदमी दे इक हिस्से दे तौर पर एह कार्यक्रम आयोजित करोआया गेआ।

<><><><><><>

PM-MKB

प्रधानमंत्री नरेन्द्र मोदी अपने माहवार रेडियो कार्यक्रम “मन की बात” दे राएं औंदी 29 दिसम्बर गी देश—विदेश च रौह्ने आहले श्रोताएं कन्नै बचार सांझे करडन। हर म्हीने दे अखीरले ऐतवारें दिनै 11 बजे प्रसारत होने आले इस कार्यक्रम दी एह 117मीं किशत होग। कार्यक्रम च शामिल कराने लेई लोक अपने बचार टोल फ्री नंबर 1800—11—7800 पर फोन करियै जां फही नरेन्द्र मोदी ऐप पर बी इस म्हीने दी 27 तरीक तगर भेजी सकदे न। मन की बात दा प्रसारण आकाशवाणी ते दूरदर्शन दे समूलचे नेटवर्क पर कीता जाहग। एहदे इलावा एह प्रसारण आकाशवाणी खबरें दी वैबसाइट ते न्यूज ऑन ए.आई.आर मोबाइल ऐप पर बी उपलब्ध होग। एहदे कन्नो कन्नी आकाशवाणी समाचार, डी.डी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी एहदी लाइव स्ट्रीमिंग उपलब्ध होग। आकाशवाणी परा मन की बात दे प्रसारण दे तुरत मगरा मकामी भाशाएं च एहदा अनुवाद बी प्रसारण कीता जाहग।

<><><><><><>

Javed Rana Reviews

जल शक्ति, जंगलात ते पर्यावरण सने जनजातीय मामलें आहले मैहकमे दे मंत्री जावेद अहमद राना होरें कल बागे—बाहू इलाके च पानी गी साफ करने सरबंधी बोरिया फिल्ट्रेशन प्लांट दा निरीक्षण कीता। अपने दौरे दरान मंत्री होरें इलाके च पेदी गंदगी पर चैता बुज्झदे होई साफ—सुथरे इलाकें दी जरूरतै पर जोर पाया। उनें जम्मू—कश्मीर च साफ—सफाई ते खूबसूरती बरकरार रक्खने दे निर्देश जारी कीते। मंत्री होरें पानी दा मय्यार बरकरार रक्खने ते पानी दी नियमित जांच दी जरूरतै पर बी जोर दित्ता तांजे लोकें गी नियमित तौर उप्पर पीने आहला साफ पानी बरोबर थहोंदा रवै। तोआई जावेद राणा होरें कल जम्मू जू च उपलब्ध सुविधाएं दा बी जायजा लैता ते उत्थे जनौरें दी उचित दिक्खमाल, सैलसफा गी बढ़ावा देने ते सांभ—संभाल सरबंधी असरदार जतनें दी जरूरतै पर जोर पाया। उनें अधिकारिणें गी निर्देश दित्ता जे ओह उत्थे औने आहले लोकें गी बेह्तरीन सुविधां उपलब्ध करोआना जकीनी बनान।

<><><><><><>

पाकिस्तानी क्रिकेट बोर्ड – पीसीबी नै 2025 आहली आईसीसी चैंपियंस ट्रॉफी च भारत कन्नै होने आहले मैचें लेई संयुक्त अरब अमीरात गी गैर–जानिबदार थाहर दे तौर पर नामजद कीता ऐ। एह गैह सुरक्षा कारणें करी भारत आसेआ पाकिस्तान दी जात्तरा करने थमां नां करने मगरा पुट्टी गई ऐ। अंतर्राष्ट्री क्रिकेट काउंसल – आईसीसी नै जंदी 19 दिसम्बर गी इस गल्लै दी तसदीक कीती ही जे भारत दे सब्बै मैच, जिंदे च सेमीफाइनल ते फाइनल दे मुकाबले च शामिल होई सकदे न, गी हाईब्रिड मेजबानी आहले तरीके तैहत्त कुसै गैर–जानिबदार थाहरै पर गै करोआये जाडन। एह फैसला भारत ते पाकिस्तान बश्कार चलै करदी तनोतनी दे चलदे लैता गोआ ऐ ते इस फैसले नै फरवरी ते मार्च म्हीने होने आहली आईसीसी चैंपियन ट्रॉफी दे कार्यक्रम दे ऐलान लेई बत्त पदरी कीती ऐ।

<><><><><>